



GRAD

1. BROJ

oktobar/listopad 2019. godine

Školske novine Osnovne škole "Novi Grad"



Nova školska godina i novi



PRVACIĆI

Mnogo je posebnih dana u životu svake škole, pa tako i naše. Kada bismo vam o svakom takvom danu pisali, imali biste itekako bogato štivo pred sobom. Posebni su prvi dani škole, dani kada slavimo važne datume, naše rođendane, dani kada osvajamo nagrade, kada naša ekipa pobjeđuje, kada realizujemo zajedno važne projekte... Prvi nastupi na školskoj priredbi ili u školskoj predstavi prave su male svečanosti... I tako, iz godine u godinu - prvi nesigurni koraci u školskim hodnicima polako prerastaju u siguran hod. Kad malo bolje razmislimo, shvatimo da je svaki dan u našoj školi poseban na svoj način. Svaki dan novi je izazov i nova priča, priča u kojoj naša djeca odrastaju, a mi učitelji i nastavnici imamo čast biti dio te čarolije.

Ipak, postoji jedan dan posebniji od svih drugih u godini, dan kada u našu školu prvi put kroče naši prvačići i unesu u nju neku posebnu radost. Tako je bilo i ove godine, ovog 3. septembra. Školsko dvorište, a potom školske hodnike ispunili su glasovi i osmijesi malih šestogodišnjaka. Njihovi radoznali, pomalo zabrinuti pogledi proučavali su sve oko sebe, a male ručice čvrsto stisnute u sigurne roditeljske ruke. Naravno, ubrzo su se svi opustili i shvatili da su u našoj školi dobrodošli, da ih tu čeka mnoštvo novih i zanimljivih stvari, da nemaju razloga za strah, jer će brigu o njima na nekoliko sati dnevno od sada voditi i tri divne učiteljice: Dženita Kalić (la), Jasmina Kasumović (lb) i Sabina Muratbegović (lc). Učiteljice su povele svoje nove učenike u učionice, pripremile za njih neke zanimljive aktivnosti i otvorile jedno novo, važno poglavlje u njihovom životu.





ŠTA JE NOVO U NOVOM GRADU

U susret 60-om rođendanu naše škole u protekle dvije godine realizovana su dva velika projekta.

Zajedničkom akcijom uposlenika, roditelja i učenika u veliki broj učionica i kabineta postavljen je laminat, a drvenu lamperiju i zidove ukrasile su i obojile vrijedne ruke naših učiteljica i nastavnica na čelu sa školskom pedagogicom.

Zatim je pokrenuta akcija ugradnje klima-uredjaja u prostorije na istočnom, južnom i zapadnom dijelu škole. Sada je boravak u ovim učionicama u maju, junu, septembru i oktobru mnogo prijatniji učenicima i nastavnicima.

U okviru projekta Vijeća učenika pod nazivom „Zajedno obojimo svijet“, podržanim od strane Fondacije tuzlanske zajednice, nizom aktivnosti s ciljem jačanja ključnih kompetencija kod učenika i razvijanja njihove ekološke kulture, bojom je uljepšan školski prostor.

Tokom školske 2017/18, uz značajnu podršku Japanske ambasade i resornog ministarstva TK, na školi su ugrađeni plastični prozori i vrata. Realizacijom ovog projekta riješen je dugogodišnji problem dotrajale drvene stolarije, problem bezbjednosti učenika i uposlenika. Našu školu je posjetio japanski ambasador gospodin Hideyuki Sakamoto, kojem su se naši učenici zahvalili prigodnim programom.

Zahvaljujući iznimnom zalaganju predsjednice Vijeća roditelja gospođe Zikrete Odobašić, od Federalnog ministarstva obrazovanja obezbijeđena su novčana sredstva za projekat utopljavanja objekta. Radovi su započeli prvih proljetnih dana, a završeni krajem augusta 2019. godine.

Sada je naša škola još ljepša i ugodnija za boravak.



Bajkovito školsko dvorište



Saradnja Međunarodnog udruženja „Interaktivne osnovne škole“ MIOS Tuzla i JU OŠ „Novi Grad“ Tuzla na realizaciji projekta uređenja školskog dvorišta je uspješno završena. JU OŠ „Novi Grad“ je aplicirala na konkursu za projekt u organizaciji MIOS-a, i bila jedna od četiri škole čiji je projekt prihvaćen i finansijski podržan. Projekat je obuhvatilo aktivnosti uređenja školskog dvorišta, tačnije uređenja cvijetnjaka od korištenih automobilskih guma. Tim koji je uspješno realizovao projekt čine pedagogica škole Natira Hebib i učiteljice Jasminka Salković i Azra Rešidbegović. Školsko dvorište sada krase predivni cvijetnjaci, čiji izgled je zanimljiv svima, a posebno našim učenicima.



ŠKOLSKO TAKMIČENJE "OSVAJAMO PADEŽE"

Povodom Dana maternjeg jezika (21. februara 2019. u 12 sati) u OŠ „Novi Grad“ je za učenike šestih razreda organiziran kviz „Osvajamo padeže“. U takmičenju je učestvovalo 20 učenika. Testirani su iz oblasti padeža našeg jezika.



Svi su pokazali zavidno znanje, a najuspješnije su bile: Elma Musemić, Sara Hamidović i Kanita Omerović, koje su osvojile prva tri mesta. Nakon kviza, učenici su imali i radionicu kreativnog pisanja. Čitali su svoje literarne rade, ali i kreirali nove, čija tema je bila naš maternji jezik.

Nastavnice: Silva Milošević – Karamović i Maksida H. Hasanović

EVROPSKI DAN JEZIKA



Evropski dan jezika obilježava se 26. septembra svake godine od 2001. godine. Vijeće Evrope i Evropska komisija proglašili su 26. septembar Evropskim danom jezika sa željom jačanja svijesti o raznolikosti jezika u Evropi, zbog promocije kulturne i jezične raznolikosti, ali i poticanja učenja stranih jezika.

Učenje jezika pomaže razvoju tolerancije i razumijevanja među ljudima koji pripadaju različitim jezičnim i kulturnim sredinama.

Učenici Va, u pratnji profesorica Amele Petričević i Selme Tihić, u četvrtak, 26.9.2019. učestvovali su na manifestaciji obilježavanja Evropskog dana jezika u Gimnaziji Ismet Mujezinović u Tuzli. Izveli su program koji je pripremila profesorica engleskog jezika Selma Tihić.



Učenici su nastupom izvan škole sticali nova i produbili ranije usvojena znanja, razmjenili iskustva s drugim učenicima, radili na razvoju socijalnih vještina, samopouzdanja i emotivne pismenosti.

VELIKI USPJEH NAŠIH UČENIKA NA JEZIČKO-KNJIŽEVNOJ OLIMPIJADI



U Tuzli je 23. marta 2019. održana Druga jezičko - književna olimpijada, u organizaciji Međunarodne škole Tuzla i Osnovne škole "Brčanska Malta".

Više od 200 učenika iz 26 škola Tuzlanskog kantona pokazalo je svoje vještine u pisanju eseja, recitiranju, debatiranju i snimanju filmova.


Naši učenici su ostvarili izvanredan uspjeh u više kategorija.



Film „Znaš li ko si“ osvojio je prvo mjesto u kategoriji kratkometražnog filma, naši recitatori sa svojim „Zapisom o zemlji“ također su osvojili prvo mjesto, a debatanti odlično drugo mjesto.

Dan školskih biblioteka

Dana 16. 10. 2019. u našoj školi obilježen je Dan školskih biblioteka. Članice „Kluba ljubitelja knjige“, učenice VII c odjeljenja, bile su domaćini i razgovarale s učenicima III a o radu Kluba.



Prezentovale su svoja omiljena pročitana književna djela i razgovarale sa malim drugarima o važnosti knjige u odrastanju. Učenici III a govorili su o lektirnoj knjizi koju trenutno čitaju, Zelena šuma – Ahmet Hromadžić, i učestvovali u nagradnoj igri. Svi učenici naše škole mogli su se tog dana učlaniti u sekciju.



POSJETA FARMI "MILO SELO"




Kada je septembar tako lijep kao ove godine, šteta je ne iskoristiti ga za boravak u prirodi. Vođeni tom mišlju, nastavnici naše škole su za učenike 3. i 5. razreda 25. 09. 2018. godine, organizovali posjetu farmi „Milo Selo“ kod Lukavca.

Ova farma prostire se na površini od 25 hektara netaknute prirode u podnožju planine Ozren, oko 5 km sjeverno od Mosorovca i Modračkog jezera. Idealni uslovi za organsku proizvodnju su stanište za 300 koza pasmine alpina. Hranjene isključivo prirodnom hranom ova mila stvorenja svakodnevno daju najkvalitetnije kozije mlijeko od kojeg se pod brižnim nadzorom mladih i stručnih tehnologa proizvode jogurti, sirevi te kozja sirutka.

Po dolasku na ovu neobičnu farmu, srdačni domaćini organizovali su nam obilazak farme i plastenika koji su bili prepuni zrelog paradajza, paprika, patlidžana... Učenicima je objašnjen postupak prerade kozijeg mlijeka u sireve sa različitim ukusima. Neke proizvode učenici su imali priliku probati uživajući u njihovim prirodnim i po-malo neobičnim ukusima.

Šetnja, boravak na čistom zraku, razgovar, druženja. Širom farme mogle su se vidjeti grupe nasmijane i razdragane djece i nastavnika. Ovo je bila prilika za učenje u prirodnom okruženju i u društvu mladih "predavača - proizvođača" koji svakodnevno pokazuju svu ljepotu i potencijale naše lijepe Bosne i Hercegovine.



Pismo prijatelju

U Američkom kutku JUNUB „Derviš Sušić“ u utorak, 29. 10. 2019. godine, održana je tradicionalna manifestacija Ovdje stanuje lijepa riječ.

Naša škola već osam godina organizator je ove manifestacije, a gosti su nam bili : OŠ „Sjenjak“, OŠ „Klokotnica“, OŠ „Lipnica“, OŠ „Miladije“ i JU Gimnazija „Meša Selimović“. Svake godine bavimo se nekom zanimljivom temom vezanom za knjigu i čitanje, a sve s ciljem unapređenja čitalačke kulture i razvijanja ljubavi ka knjizi. Ove godine naša tema bila je Pismo prijatelju. Pokušali smo, a čini nam se i uspjeli, podsjetiti sve prisutne na ljestvu i toplinu pisanja pisma, te zaboravljenih, a tako fine vrste komunikacije među ljudima. Profesorka i pjesnikinja Mirela Avdagić uljepšala je druženje svojim obraćanjem i svojim stihovima koji govore o pisanju.



I OVE GODINE NA VEZENOM MOSTU...

Izuzetna nam je čast, ali i neopisiva sreća, učestvovati na „Vezenom mostu“, manifestaciji od ogromnog značaja za dječiju književnost u našem regionu. Ovogodišnji Vezeni most trajao je od 22.10. do 25.10. 2019, a učenici naše škole, članovi dramske i literarne sekcije imalog hora, bili su organizatori jedne od aktivnosti. U utorak, 22.10.2019., organizirali su druženje pod nazivom „Portret pisca“, na kojem su veoma uspješno i kreativno prikazali lik i djela Kemala Mahmufefendića, dobitnika nagrade Mali princ za stvaralački doprinos dječjoj književnosti u 2018. godini.



PROMOCIJA DJEČIJE KREATIVNOSTI I TALENTA




Koncert Aide Rešidbegović

U Međunarodnoj galeriji portreta u Tuzli je 16. oktobra 2019. godine održan 3. solistički koncert mlade violinistice Aide Rešidbegović.

Aida je učenica osmog razreda Osnovne škole „Novi Grad“ u Tuzli i peti razred Osnovne muzičke škole Tuzla. Svira od svoje šeste godine. Osvojila je brojne vrijedne nagrade na međunarodnim takmičenjima. Prvi koncert je održala sa deset godina u Tuzli, drugi koncert 05. oktobra 2019. godine u Beogradu i treći 16. oktobra 2019. godine u Tuzli. U prepunoj dvorani Galerije, mnogobrojni posjetitelji su uživali u prelijepim melodijama Handela, Schuberta, Kreislera, Veczeza, Pugnania i Wieniawskog. Nakon prve kompozicije, Aida se obratila prisutnim i zahvalila se nastavnicima Osnovne škole „Novi Grad“ na velikoj podršci i razumijevanju, koje joj puno znači.

SREBRNA NA DRŽAVNOJ SMOTRI TEHNIČKOG STVARALAŠTVA

Da se mobitel može koristiti i na kreativan način, pokazala je Kanita Omerović, učenica Vla OŠ „Novi Grad“ Tuzla. Ova odlična i primjerna učenica prošle godine se uključila u foto-sekciju. Njene prve fotografije nagovještavale su iznimnim talenat i ljubav prema umjetničkoj fotografiji. Učeći o osnovnim elementima fotografije: kompoziciji, kontrastu, koloritu, dijagonali. Kanita je konstantno napredovala i gradila svoj jedinstven stil, prepun emocije, lijepog, životnog. Tako je do marta stvorila solidnu kolekciju zanimljivih umjetničkih fotografija. Na Državnoj smotri tehničkog stvaralaštva mlađih BiH, koja je održana sredinom maja 2019. godine u Bugojnu, Kanita Omerović je osvojila II mjesto.



“Regata”



“Dva drugara”

Pored ove vrijedne nagrade roditelji su je nagradili fotoaparatom. Ova podrška roditelja za nju je iznimno važna.

Od septembra Kanita, istražujući i igrajući se sa oblicima i sjenama, stvara novu kolekciju.

DAN UČITELJA

Ima li ljestvica poklona za Dan učitelja od uspjeha i stvaralaštva naših učenika.

Tako smo dočekali ovogodišnji Svjetski dan učitelja i iskoristili posebnu priliku da zahvalimo svim učiteljima na nesobičnom trudu, strpljenju i znanju koje ulažu u obrazovanje novih generacija.



Oni su podrška svojim učenicima, te s puno ljubavi i strpljenja nadahnjuju školarce svojim primjerom. Svjetski dan učitelja obilježava se svake godine 5. oktobra. Taj je dan prigoda da se pokaže da je rad učitelja i nastavnika prepoznat kao jedan od najvažnijih za ukupan razvoj društva te da se kao takav i cijeni. Cilj Svjetskog dana učitelja je mobilizirati podršku za nastavnike kako bi se osiguralo da učitelji i dalje ispunjavaju potrebe budućih generacija te podižu obrazovanje na razinu društvene važnosti, izvući učitelje iz poluanonimnosti i dati im mjesto koje zaslužuju. Prigoda je to i za isticanje važnosti rada svih učitelja i nastavnika i njihovog uticaja na razvoj društva u cjelini, te naglašavanje važnosti te profesije, ali i samog obrazovanja čiji su oni nositelji. Stoga se taj dan obilježava u više od 100 zemalja svijeta, pa tako i u Bosni i Hercegovini.

Učiteljska profesija jedan je od najljepših i najodgovornijih poziva, a današnji je dan još jedna prigoda da se prisjetimo koliko je važan. Stara grčka mudrost kaže: "Ako ne budemo imali krojača, hodat ćemo goli. Ako ne budemo imali obućara, hodat ćemo bosi."

Ako ne budemo imali dobrih učitelja, neće nas biti. Sretan Vam Svjetski dan učitelja!


DOBRO DOŠLA, JESENI

U okviru planiranog ciklusa edukativnih radionica za školsku 2019/2020. godinu učenici prvih razreda Osnovne škole „Novi Grad“ Tuzla, obilježili su dolazak jeseni kroz kreativne radionice.

Prvačići JUOŠ „Novi Grad“ ovu radnu sedmicu posvetili su bogatom i lijepom godišnjem dobu, jeseni. U jesen dozrijevaju mnogobrojni plodovi, spremamo zimnice, i obilježavamo 20. oktobar, Dan jabuke, najzdravije voćke s našeg područja. Učenici prvih razreda su prezentirali svojim drugarima šta su do sada naučili o ovom godišnjem dobu. Glavni cilj im je bio da skrenu pažnju na važnost zdrave ishrane, bazirane na plodovima i proizvodima od plodova sa našeg podneblja.



Ovu aktivnost pod nazivom „DOBRO DOŠLA, JESENI“, zajedno sa malim ljubiteljima prirode, podržali su i njihovi roditelji. Fotografije njihovih radova govore više od riječi.



SMANJENJE RIZIKA OD KATASTROFA

i sigurnost djece u Osnovnoj školi „Novi Grad“ u Tuzli



Program smanjenja rizika od prirodnih i drugih nesreća Save the Children-a podrazumijeva saradnju službi civilne zaštite i vatrogasaca sa školskim administracijama, kako bi se minimizirali rizici po djecu u školama u slučajevima prirodnih i drugih nesreća.

Nikada ne znamo kada će nas pogoditi neka prirodna nesreća ili nesreća izazvana ljudskim djelovanjem. Zato je Aktiv učiteljica prvih razreda 22. 10. 2019. godine svoje učenike zajedno sa članovima Štaba civilne zaštite Tuzla kroz edukativne i zabavne radionice pokušao pripremiti kako da se ponašaju u školi u slučaju vanrednih opasnosti.



SPOMENICI PALIM BORCIMA BLIZU NAS

Četvrtak, 17.10.2019. godine, bio je sunčan i lijep dan. Učenici četvrtih razreda su ga sa svojim učiteljicama odlično iskoristili. Prošetali su i posjetili Memorijalni kompleks na Slanoj banji, pogledali spomenike palim borcima iz oba rata koji su dali život boreći se za mir i slobodu. Naučili su nešto važno i nešto novo!

Ovom prilikom učenici su učili o svojoj prošlosti obilazeći spomen obilježje sa imenima poginulih boraca Odbrambenog rata 1992-1995, spomenik brigadama i odredima koje su oslobodile Tuzlu 1943., spomenik osloboodiocima grada, kameni monolit, spomen-obilježje 50 godina SKJ. Također, tom prilikom su posjetili spomen kompleks sa bistama Josipa Broza Tita i 18 narodnih heroja, spomenik sa uklesanim likovima tri borca, dva spomenika žrtvama fašističkog terora, te Partizansko groblje sa 687 mermernih ploča sa uklesanim imenima boraca iz NOR-a.

**Važno je poznavati prošlost
da bi bili uspješni u sadašnjosti i budućnosti!**



Posjeta Zaštićenom području Konjuh

U petak, 27.09. 2019, učenici 9a i 9b naše škole posjetili su Zaštićeno područje prirode „Konjuh“. Ovu edukativnu posjetu organizovala je italijanska nevladina organizacija CISP koja je upriličila predavanje o ovom jedinstvenom zaštićenom području.

Učenicima je naglašena važnost zaštite prirode i očuvanja endemskih biljnih i životinjskih vrsta, koje se mogu pronaći na ovom prostoru.

Nakon predavanja organizatori su upriličili zajednički ručak, a poslije toga rekreativne i sportske aktivnosti.

Poslije kraćeg odmora, odigrana je utakmica sa ekipom učenika OŠ „Šerići“, koja je također bila u posjeti ovom kompleksu. Navijanje, cika, vriska - kao na pravoj utakmici. Kako sve ima početak i kraj, poslije ovog lijepog druženja vratili smo se u Tuzlu i prepričavali brojne dogodovštine.

Ovo je prilika da se zahvalimo CISP-u za ovu zanimljivu, a istodobno relaksirajuću posjetu.





U toku predavanja pažljivi, kao i uvijek



Pripreme za utakmicu Novi Grad - Šerići

POSJETA UČENIKA TREĆIH RAZREDA NLB

Svjetski dan štednje slavi se svake godine 31. oktobra u znak sjećanja na 1. Međunarodni kongres štednje koji je održan na ovaj dan 1924. godine u Milanu. Kako bi se djeca upoznala sa značajem štednje i sticanjem štednih navika, učenici trećih razreda sa svojim učiteljicama Senadom Ljubović, Sanelom Jusufović i Azrom Rašidbegović, boravili su u posjeti tuzlanskoj poslovničkoj zgradi NLB banke. Zaposleni su im prezentirali pojam i značaj štednje i upoznali ih sa radom pojedinih uposlenika u banci te pripremili prigodne poklone. Kako to obično i biva, gdje su djeca tu su zabava i pjesma. Učenici su, na veliko zadovoljstvo uposlenika i prisutnih građana, otpjevali pjesmu „Prijatelji, prijatelji“.

„Ako štedimo danas, imat ćemo više sutra“, zaključak je naših učenika.

„Štednja je mudrost življenja.“



KAKO SE ZDRAVO HRANITI?

Svima je nama važno imati dovoljno energije za sve što želimo činiti: bavljenje sportom, šetnju, učenje, druženje s prijateljima... Ako se pritom razvijamo i rastemo te od svoga mozga svakodnevno očekujemo da zapamti nove informacije, još više pažnje trebamo posvetiti pravilnoj ishrani.

To znači da sa svim gaziranim pićima, bombonima i raznim "grickalicama" nipošto ne smijemo pretjerivati. Na takvim nam namircama tijelo nije zahvalno jer mu ne daje vrijednu i potrebnu energiju nego samo prazne kalorije.

Evo nekoliko osnovnih informacija o tvarima koje grade naše tijelo i namircama u kojima se one nalaze (iz kojih ih tijelo uzima).

Tvari koje nam daju energiju:

- ugljikohidrati (žitarice i proizvodi od njih, riža, tjestenina, slatkiši)
- masti (ulja, masti, meso, mesne prerađevine)

Tvari koje nas štite:

- vitamini i minerali (voće, povrće, ribe)

Pravilna prehrana svakog čovjeka treba biti raznovrsna, redovita, pojedena u miru uz obavezan doručak.



Raznovrsno znači od svega pomalo: i meso i nešto ugljikohidrata, voće, povrće, barem litra vode ili nezaslađenog čaja; masti ne spominjemo jer ih ima u mesu, u mliječnim proizvodima i s njima ne treba pretjerivati.

Zeleniš, baš kao i varivo, jako je bitno, pa makar pojeli i samo pet žlica dnevno, ali to se mora jesti jer organizam treba raznovrsne tvari. Na taj način svoje osjetilo okusa ipak privikavamo na ne baš uvijek omiljene namirnice.

Zažmiri i pojedi!



Gazirana pića, čips, kokice i slični sadržaji njima primamljivih vrećica nikako nisu dobar, a kamoli zdrav obrok, posebno ako je to prvi jutarnji obrok. Skriveni šećeri i kofein u gaziranim pićima uzrokuju pad koncentracije, razdražljivost, a time i smanjenu pažnju na nastavi. Naravno, tu je i nakupljanje suvišnih kilograma.

Preporuke:

- Obavezno prije škole nešto pojedite, (malo kruha, nekoliko napolitanki, müsle, pahuljice, nešto iz pekare) i popijte mlijeko, čaj, vodu.
- Pojedite konkretan obrok u školi (sendvič koji uključuje i povrće, banane, jabuke, može i keks ili pecivo – svaki dan nešto. Tijelo i duša bit će zadovoljni).
- Pijte vodu ili čaj s manje šećera, ali nikako gazirana pića!
- Kod kuće pojedite sve što je ponuđeno za obrok.
- Voće jedite između obroka ili sat vremena prije obroka.
- Pojedite lagano večeru.
- Ne pijte cedevitu navečer jer razbuđuje kao i cola.

Nadamo se da ćete posvetiti više pažnje svojoj ishrani.